

豫章叢書

第四冊



否泰錄

一卷

丁卯冬月
于南昌復廬

復辟錄

景泰八年春正月上染疾免百官朝數日內外羣臣患之十有一日左都御史蕭維禎左副都御史徐有貞率十三道同百官問安於左順門外太監興安自內出問曰若皆何官維禎答曰乃都御史六科十三道給事中御史五府六部堂上官聖體不甯謹來問安興安以指作十字謂病之篤不過是日耳又曰若皆朝廷大臣耳目不能爲社稷計日日徒問安耳衆乃惶惶而退卽日維禎同有貞集十三道御史議曰今日興安之言若皆達其意

而關天數焉蓋所記訖於英宗初歸之時未敘
及後來丁丑復辟之事故其立言如此其曰身
備史官者正其遷右庶子時他書引此或作閣
老劉定之撰者據其所終之官言之耳

否泰錄

永新劉定之著

太祖高皇帝驅逐胡元遁歸朔漠其末帝妥懽帖木兒旣殂太祖以其嘗臨天下謚爲順帝順之胤據故土仍君長其醜類世數莫考惟知其地名瓦剌其君立于宣宗皇帝時者名普花此稱爲可汗而彼自稱不可知計必仍僭其先世大號也故其臣亦悉用故時將相稱號稱丞相二人曰和寧王阿魯台曰順寧王脫懽常遣使者朝貢朝廷賜以詔書亦稱之曰王其後二人相繼死而脫懽之子曰野仙悉有二人部

屬其號爲太師君臣異處常不相見普花娶野仙妹以相固結今皇帝卽位以來野仙每年冬遣人貢馬朝廷厚答金帛過元旦郊祀始遣還然而漸桀驁不恭往來通事等變詐翻覆告以中國虛實野仙求以其子結嫺于帝室通事皆私許野仙進馬爲聘儀朝廷不知也答詔無許嫺意野仙愧怒以正統十四年七月初八日寇塞外城堡多陷沒邊報日至遣駙馬都尉井源等四將各率兵萬人出禦之源等旣行司禮太監王振復勸上親征命太師英國公張輔太師成國公朱勇等治兵朝臣奏疏請留不允十七日

駕行命鄜王居守每旦於闕左門西面受羣臣謁見
偕太監金英吏部尙書王佐鄜塾學士曹鼐等官軍
私屬共五十餘萬人出居庸關抵宣府井原報敗踵
至上至大同暮有黑雲如繖罩營雷雨大作振惡之
乃勸駕還八月十三日至狼山虜追及遣朱勇等三
萬騎還戰皆敗死無隻騎回是日駕至土木日尙未
晡去懷來城二十里欲入保懷來振輜重千餘輛在
後未至留待之遂駐土木傍無水泉又當虜衝十四
日欲行虜已逼不敢動兵士束手饑渴十五日虜使
持書來以求和爲言召曹鼐草勅與和遣二通事與

虜使偕去遂移營踰塹而行迴旋之間行列已亂爭先奔走勢莫能止虜騎蹂陣而入奮長刃以擊我軍大呼解甲投刃者不殺衆裸袒相蹈籍死蔽野塞川宦侍虎賁矢被體如蝟上與親兵乘馬突圍不得出虜擁以去文武軍士幸免者蓬頭赤身踰山墜谷連日饑餓得達關虜舉我輜重惟取其金銀珠寶貴細者其實虜衆僅二萬我師死傷者過半十六日上在虜營手書遣使與懷來守將言被留且索金幣懷來城閉不可入繼而登復遣人送至京以其夜三鼓從西長安門入報十七日百官集闕下頗聞敗報私相

告語愁嘆驚懼出至紫陌見軍士奔歸搶殘被體血
汚狼籍然尙未知上所在也是日午遣黃金珠玉袞
龍段匹等物駝以八馬詣野仙營請還車駕十八日
皇太后召百官入集闕下酈王權總萬機於午門南
面見百官啟事奉令旨施行眾皆謂行且卽真矣數
日內外洶洶不自保已而皇太后詔天下立皇子見
深爲皇太子又數日尙書于謙等彈奏奸臣王振傾
危宗社歷數其罪萬千言讀旣畢王諭以自有處置
謙等言振罪惡滔天今日不正典刑滅其族臣等皆
死于此決不但已也因舉哭聲徹中外王起入內使

將闔門衆推謙等隨入太監金英傳令旨且退衆奮
欲捽英英懼言令籍沒振遣指揮馬順往衆曰奸臣
黨也宜遣都御史陳鑑英脫皂入順前勸解辭色稍
遽給事中王竑捽順首衆爭毆之蹴踏搶裂頃刻而
斃或就脫順鞭擊出眼血流門闔前衆愈怒求內使
毛玉等二人英使人捽出亦擊殺之曳三屍陳于東
安門軍士猶爭擊不已陳鑑等奉令旨籍振宅并其
黨彭得清內使陳宦等家執振姪錦衣衛指揮王山
至反接跪于廷共唾罵之令旨獎諭百官各歸蒞事
拜謝而出明日移王座入奉天門左受朝由此卽眞

之議益急振宅在城內外凡數處重堂邃閣擬于宸
居器服綺麗尙方不逮玉盤徑尺者十四珊瑚樹高
六七尺金銀十餘庫馬數萬疋巒山于市其族屬無
少長皆斬山弟林亦爲錦衣衛指揮從征死於虜林
尤凶悍姬妾百數二十二日虜擁上至大同城門不
開校尉袁斌隨侍以頭觸門大叫於是廣寧伯劉安
給事孫祥知府霍疸同出見獻麟龍袍上以賜知院
伯顏帖木兒及野仙弟大通漢王上曰秋稼未收軍
士久饑可令刈以入城又曰虜欲歸我情僞難測宜
嚴爲備安等獻酒上酌地飲訖虜令括城中犒軍物

并內官郭敬等金銀共萬餘兩來迎駕既獻虜笑不
應二十三日上索西瓜雪梨與虜食訖遂去過貓兒
莊九十海子見蘇武廟李陵碑二十八日至黑松林
野仙營在焉上入營坐野仙拜稽首乃侍坐宰馬設
燕出其妻妾四人以次奉上酒歌舞爲娛其後遂奉
上居于伯顏帖木兒營去野仙營千餘里伯顏帖木
兒與妻見上亦如野仙禮伯顏帖木兒每二日獻羊
七日獻牛野仙每七日獻馬二人每出獵則又以其
所獲野馬黃牛之類來獻二十九日皇太后命王早
正大位以安國家有司擇日行禮衆牽詣文華殿請

王出見辭讓不允衆共言祖宗神器不可虛聖母有命不可違有旨從請乃再拜山呼而出九月初野仙遣酋長尙書來言欲送上還京人見賜以冠帶綵段臨行以金百兩銀二百兩綵段若干匹賜野仙初六日王卽皇帝位遙尊上爲太上皇大赦天下百官六軍賞賜有差後十數日野仙復遣使至書辭悖慢朝廷復書大略言中國已立皇帝天下兵甲衆盛可相抗禦之意已而命羅通孫祥皆爲副都御史守居庸紫荆關石亨爲武靖伯總京師兵馬十月野仙入寇自紫荆關入殺指揮韓清等孫祥走死初九日虜至

京城西北關外石亨等營于城北兵部尙書于謙督其軍都督孫鏗營于城西刑部侍郎江淵參其軍交趾舊將王通爲都督鴻臚卿楊善爲副都御史守城虜攻城連日抄掠亨等與之殺傷相當其酋長鐵頭元帥死焉時畿甸降附胡人留居者多乘時爲寇朝廷重賞購捕被獲者累日不絕虜時小沮復遣使言欲和十七日以通政參議王福爲禮部侍郎中書舍人趙榮爲鴻臚寺卿持羊酒往野仙與其弟及伯顏帖木兒環甲胄屬弓矢太上帶刀引福等前露刃挾之福等拜訖野仙揮却羊酒取勅視蕃字太上取勅

視漢字野仙謂福爾等皆小官可令胡濙王直于謙
石亨楊善等來福辭歸時四方兵漸集虜夜遁從居
庸關出遺所掠人口牛羊于路以緩追兵太上自紫
荊關出乘馬踏雪而行遇險則袁斌執鞚旣入虜境
野仙來見宰馬拔刀割肉燎以進云勿憂終當送還
食訖辭去十九日瓦剌可汗普花遣使獻馬先此普
花駐兵關外未入至是月尋舊約通和爲言朝廷却
之胡濙王直言普花野仙君臣素不睦宜受其獻以
間之從濙等言使人入見獻馬八匹賜衣服冠帶酒
饌金帛視常年有加二十二日遣楊洪孫鏜范廣等

帥兵二萬擊虜之未去者二十五日破虜於固安得馬牛驢數百匹奪還人口萬餘十一月初八日以虜既退京師解嚴降詔撫安天下十日免朝百官望拜太上聖節于朝天宮十三日楊洪等旋師入見言虜衆已盡絕其實不過百餘散掠各郡人畜以自擁衛望之若萬衆官軍不敢逼其南去者各郡以漸捕獲之北去者洪等逐至關殲焉洪既奏捷以洪爲昌平侯與副都御史羅通練兵于東教場石亨練兵于西教場二十三日野仙遣使來索大臣迎駕約以後月初三日至其營不然又入寇書辭甚慢不答二十九